



ATASSUT

UPA14/48-1

Knud Kristiansen

15.05.2014

Innuttaasuni utoqqaat amerligaluttuinnarnerat eqqarsaatigalugu utoqqarnik isumassuinitinnut ilaatillugu utoqqarnut ininik neqerooruteqartarnerput siumut sammisooqqullugulu ullutsinnut naleqquttooqqullugu utoqqarnut inissianut tunngatillugu suliassaqarfimmi pilersaarusiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Inuit Ataqatigiit sinnerlugit Inatsisartuni ilaasortaq Aqqaluaq B. Egede matumani Innuttaasuni utoqqaat amerligaluttuinnarnerat eqqarsaatigalugu utoqqarnik isumassuinitinnut ilaatillugu utoqqarnut ininik neqerooruteqartarnerup siumut sammisooqqullugu ullutsinnut naleqquttooqqullugu utoqqarnut inissianut tunngatillugu suliassaqarfimmi pilersaarusiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuusianut imatut ATASSUT-mit oqaaseqassaagut:

Siullertut siunnersuuteqartoq qutsavigissavarput siunnersuuteqarnermigut nunatsinnit inuiaqatigiittut annertuumik unammilligassat tassalu utoqqaat amerligaluttuinnartut eqqarsaatigalugit utoqqarnik isumassuinitinnut tunngassuteqartut maani oqaluuserineqarsinnaammata.

ATASSUT-ip naalakkersuinikkut suliniuteqarnerannut annertuumik siunnersuutip tunngavia naapertuuppoq, tassami ATASSUT-mit pingaartilluinnarparput inuiaqatigiinni ukiorpassuarni inutaaqataasutut sulereersimanerup kingorna utoqqalinermi pitsaasunik utoqqartarilikkatsinnut ataqqinnilluni atugaqartitsinissaq.

Taamaattumik ATASSUT-mit iluarisimaarparput Naalakkersuisut siunnersuummut akissuteqaammi saqqummersimmassuk Naalakkersuisut aamma utoqqarnut isumassuinermi suliniutit pitsannorsarneqarnissaannut annertuumik suliniuteqarfigineqalereersimaneri.



ATASSUT INATSIARTUNI

ATASSUT-mi ilisimalluarparput utoqqarnut inissianik allatigulluunniit najugaqatigiiffinnik sanaartornissami aningaasartuutit Namminersorlutik Oqartussat kisimik nammatassarinnikkaat, tamannami pisarpoq Namminersorlutik Oqartussat kommunillu sanaartornermi aningaasartuutunik avitseqatigiinnikkut. Taamaasilluni aamma sanaartugassanik pingaarnersiuneq kommunini ilaatigut inissisimanermigut akisussaaffik tamarmi Naalakkersuisuniinnani, taamaattumik ATASSUT-mit manna iluatsillugu Naalakkersuisunut aammalu kommuninut kaammattuutigissavarput suliat maannakkut ingerlanneqalereersimasut eqqarsaatigalugit qanimut suleqatigiilluartoqarnissaanik – sapinngisamik tulleriarinerit tamanut naammaginartumik ingerlanneqarsinnaanissai qulakkeerumallugit.

Aammattaaq ATASSUT-mit pinngitsoorusunngilagut piumasarissallugu sanaartornerup nalaani sanaartukkanik nakkutilliinerit sukumiisumik ingerlanneqartarnissaata qulakkeerluarneqarnissaa, misilittakkammi ajoraluartumik uppersitimmassuk, ukiuni arlalinni tassuunakkut ingerlatsinermi sanngiiffeqarsimaneq.

Taamatut ATASSUT-mit siunnersuut oqaaseqarfigalutigu, kissaatigaarput matumani oqaluuserinninnermi kaammattuutigineqartut Naalakkersuisunit ilassilluarneqarlutik sulianut ingerlanneqalereersimasunut ilanngullugit eqqumaniarfigineqarumaartut. Suliat ingerlanneqalereersimaneri tunngavingalugit siunnersuummut Naalakkersuisut akissuteqaataat tusaatissatut ATASSUT-mit tiguvarput, innersuussutigalugulu siunnersuutip taamatut isikkoqarluni itigartinneqarnissaa.